



Шочмо эл, порылык да чын верч!

Б У Д Ъ Г О Т О В /

Ямде лий

1-ше (3701) №,
2025 ий 10 январь,
кугарня



0+

1933 ий 1 февраль годсек лектеш.



У ийыште лийже пүсö перада!

Арамлан огыл У ий пайремым юзо шұлышан маныт. Марий сылнымутым пагалыше да «Ямде лий» газет дене пенгыде кылым кучышо икмынар чолга тунемше тидым шкеак шижын да ужын кертын. Самырык тукымым шочмо марий йылмым, сылнымутым аклаш кумыландыме, йоча-шамычын возымо усталыкыштым вяндыме шонемаш дене ий еда эртарыме «Рвезе йүк» республикысе конкурсым лач У ий вaшеш иктешленна.

Идалык мучко йоча газетым түрлө заметке, почеламут, ойлымаш да моло дене пойдарен шогышо

ўдыр-влакым да школысо юнкор кружокым В.Х.Колумб лүмеш республикысе йоча книгагудышто саламленна. Йоча газетын икымше редакторжо З.Е.Яковлева лүмеш премий дене Морко район Коркатово лицейыште тунемше Полина Алексеева палемдалтын. Ты лицейынак юнкор кружокшо (вуйлатыше – В.Е.Смирнов) В.Исенеков лүмеш премийым сенен налын. Морко район Эгерсола школышто тунемше Ксения Бутенина поэзийыште ойыртемалтын. Антонов Ивук лүмеш премий дене суапландаралтын. «Ямде лий» йоча газет дене ўмыр мучко кылым кучышо

кугыен-шамычымат посна премий дене палемдена.

Снимкыште: Ксения Бутенина, Полина Алексеева, Коркатово лицейысе юнкор кружокын тунемшыже-влак Олеся Петрова ден Света Соколова.

Е.СЕРГЕЕВАН фотожо.

Умбакыже – 3-шо лаштыкыште.

«Рвезе йүк» конкурсым эртарыш полшымыжлан Марий Элын калык писательже В.А.Абукаев-Эмгак лүмеш «Ший памаш» поро кумылым ончыктыммо сылнымут фондыв вуйлатыше В.Красовлан кугу таум ойлена.

Российысе увер

«Жизнь, далёкая на граммы» всероссийский йоча сүрет конкурс Кугу Ачамланде сарыште Сенгымашлан 80 ий теммылан пöлеклалтын. Паша-влакым 16 февраль марте колтыман. Тұрыс увер – геотеатр.рф сайтыште.

Мланде паша дене илышыштым кылдыше сн-влаклан пöлеклалтше «Хлеб всему голова» всероссийский агитаций плакат конкурс 28 февраль марте шуйна. Куд ийым темыше да кугурак ийготан йоча-шамыч тангасымашке ушнен кертыт. Йодмашым hlebvsemugolova.ru сайтышке колтыман.

Тыглай йылме дене шанче теорийым умылтарен кертаг мо? «Знаешь? Научи!» видеоролик конкурсышто шкендым терген ончо. Пашатым nauka.atomarium.ru сайтышке 1 март марте колто. Видеороликым 7-17 ияш йоча-влак возен кертыт.

Марий Элысе увер

Кугу Ачамланде сарыште Сенгымашлан 80 ий темме вашеш «Край родной марийский» республикысе краеведений конкурс эртаралтеш. Тудо 23 апрель марте шуйна. Тичмаш увер – rv12.ru сайтыште.

«Паша чап ола» – тыгай лү-мым Кугу Ачамланде сар годым сенгымашке шуаш кугу надырым пыштыше ола-влаклан пуат. Ынде Йошкар-Олат тыгай чаплум дене палемдалтын.

23 январьыште Советский район Вечын школышто «Творчество. Познание. Труд» VII республикысе шанче-практике конференций эртаралтеш. Тушко 1-11-ше класслаште тунемше да туныктышо-влак ушнен кертыт. Тұрыс увер – Марий туныктыш институтын сайтыштыже.



Вуйлатыше деч – пöлек

Марий Эл Республикым Вуйлатыше Ю.В.Зайцев «Ёлка желаний» всероссийский акцияш ушнен да икмыняр йочан йодмашыжым шукташ полшен. Теве Морко район гыч Павел, Макар, Роман Ивановмыт сюрприз сынан пöлекым вученыт. Ты еш «Алатойс» виянаш полшышо модышым ыштыше фабрикыште лийын. Рвезе-шамыч мастер-классыш ушненыт да шке кид дене модышым ыштеныт. Нунылан фабрик мучко экскурсийым эртареныт, үстел модышым да театрыш ұжмашым кучыктеныт.

Пöлек Марий Турек район гыч Савельевмыт ешышкат миен шуын (снимкыште). Марий Эл Республикысе Правительстве Вуйлатышын алмаштышыже – тўвыра, печать да калык-влакын пашашт шотышто министр К.А.Иванов Ильялан конструкторым, Никиталан шахматым, Варвара шўжарыштан сувенир ден шере сийым, аваштан театрыш ұжмашым кучыктен.

О.МОШКИНА-МАЙКОВА.
Фотом «Движение Первых» регионисо толкынын «ВКонтакте» тўшкаж гыч налме.



Уста да чолга

У ий кажне снлан куаным конда. Йоча-шамычлан поснак. Теве Волжский район Сотнур школ гыч Елизавета Тимофеева, Карай школ гыч Анна Садовина, Шарача школ гыч Татьяна Веселова, Купсола школ гыч Ирина Петрова (снимкыште) тиде шонымаш дене келшат. Идалык мучко тунемаште, мер пашаште ойыртемалтмыштан «У ий йомак» пайремыш

ұжмашым налыныт. Кажне ұдыр шке семынже уста. Лиза ден Ирина почеламутым сылнын лудыт, Тая марий йылме дене олимпиадыште кўкшö лектышым ончыктен, а Аня шахмат дене модеш. Ёдыр-влак ончыкыжымат чолга лийыт да ятыр сенгымашке шуыт манын ұшанена.

Е.СЕРГЕЕВА.
Авторын фотожо.

У ийыште лийже пүсө перада!

Тўналтышыже – 1-ше лаштыкыште.

Тений «Почётан юнкор» лўм дене Медведево посёлкысо 6-шо номеран «Онгыр» йочам виандыме рўдерын кугурак воспитательже О.В.Казанцева (снимкыште) суап-ландаралтын. Ольга Валерьевна йочаж годым чолга юнкор лийын, а кызит газет лаштыклам тўрлө пашаж дене пойдара.

– Йоча газет дене кылым кучымаш илыш вийым ешара, ўшаным пуа, у сенымашке шуаиш кумыланда, – ойла О.В.Казанцева. – Пашаитемат «Ямде лийым» кучылтам. Йоча газетын ўмыржө кужу лийже, кажне икшыве тудым куанен вучыжо.



Самырык тукым конкурсышко ушна, но возкалыше-влакын чотышт ий еда шагалемеш, школлаште сылнымут деке шўман-дыме паша начарын виянгеш. Теве мыскарам серыше-шамыч уке улит. Сандене Шулдыр Васлий лўмеш премий пуалтде коদেশ.

Марий Элdech ўрдыжтө марий-влакын тўшкан илыме кундемлаштат юнкор паша «окшакла». Ончыкыжым ыштышаш сомыл ятыр. Икте-весьым умылен, икте-весьылан польшкален, у сенымашке пырля ошкылман. Тек у ий юнкор-влаклан поян лиеш, а нунын перашт утыр пўсемеш.

А.ГРИГОРЬЕВА.
Е.СЕРГЕЕВАН фотожо.

2025 ий – Шочмо элым аралыштын идалыкше

Герой шўмыштына ила

Акрет годсек Русьышто шуко герой лийын. Нуно шочмо мландын чапшым нёлтеныт, араленыт. Ме, самырык тукым, Российын эргыж-влак дене кугешнена. Ик тыгай тале сарзеген, Александр Семёнов, мемнан Арын школышто тунемын. Спортлан шўман кушкын, ача-аважлан сурт пашам ышташ польшкален. Шочмо эл ончылношке порышым шуктен. Армейрадам гыч толмек, Йошкар-Олаште шинчымашым налын. Но Александр Алексей изаже семын военный лияш шонен. 2017 ий сентябрьште самырык рвезе контрактным подписатлен да Таджикистаныште служитлаш тўналын. 2022 ийыште специальный военный операцияш каен. Тиде ийынак лўддымө салтакын ўмыржө кўрылтын. Тудым, колымекыже, «Патырлык» орден дене палемденыт.

А.А.Семёновым шарныме лўмеш Арын школышто ече дене районысо тангасымаш эртаралтын. Тушко шуко ечызе ушнен. Меат вийнам тергенна да сенгыше-влак радамыш лектынна. Мыланна медальым да пөлекым кучыктеныт. Тиде татым эре шарнаш тўналына.

Настя НОВИКОВА,
Нина ЯКОВЛЕВА.
Морко район.

Омсажым почын

У идалык омсажым мыланна почо. Кылже гыч кучымо годым тыгай шонымаш шочо: тудым кузе вашлияш да кузе эртараш? Ушышто пуйто шкеак возалте: мутат уке, ўшан дене вашлийын, сенымаш-влак дене лишыл енем-шамычым куандараш. Тугеже ик кечат арам эртышаш огыл. Кажне кечын лап возын тыршыман. Тўнжө – келге шинчымашым налман.

Александр ИВАНОВ.
Йошкар-Ола, 31-ше номеран школ.



Тошто модыш ончер

Кызит кевытыште могай гына у ий модыш уке?! Ожно вес сынан лийыныт. А.Конаков лўмеш Шернур тоштер да ончер комплексыште эртаралтше выставкыште кодшо кумымын 50-90-ше ийласе модыш-влак дене палыме лияш йөн уло.

– Ончерым 2000-ше ийлаштак чумыраш тўналынна. Модышлам Шернур районысо яллаште да посёлкышто илыше-влакdech погенна. Кажне модыш тўрлө жапым ушештара. Ялозанлык дене кылдалтыше ятыр: кияр, кукурузо, олма, грушо. Ракете, спутник, космонавтын фигурыжо ойыр-

темалтыт. Йомакысе герой-шамыч Айболит доктор, Чиполлино, Лумвен, Йўитө Кугыза улит. Янлык-влак кожышто кўлеш верым муыныт. 1960-шо ийласе модыш ике чиялтыме, сўрастарыме дене ойыртемалын. А 1980-ше ийлаште папье-маше, шукыжым янда гыч ыштенит, – ойла директор Т.М.Гусева.

Ты ончер кажне ийын эртаралтеш гынат, йоча-влак кажне (снимкыште) гана куанен коштыт.

Х.АЛЕКСАНДРОВА.
Фотом тоштерын архивше гыч налме.

Икымше кечын

Шорыкйолын первый кечын
Ший У ий пайрем толеш.
Сылнештен кугу сурт-печым,
Мурымет гына шуэш.

Тек мондалтыт ойго, йӱсӱ,
Да шарналтыт ямле, сай.
Уштына сӱрет гыч кочым,
Лийышт шошо, сылне май.

Мый У ийын первый кечын
Порым, сайым сугыньлем.
Луктын угыч чапле ечим,
Йолташ-шамыч дек вашкем.

Регина ГРИГОРЬЕВА.

2-шо номеран Морко школ.

Тӱн теле пайрем

Марий тӱвыраште тӱн теле пайремлан Шорыкйол шотлалтеш. Финн-угор тӱшкаш пурышо моло калыкынат тыгай пайремышт уло. Мордва калыкын Рошто кече дене кылдалтын. Роштувань куд (Рошто кудо) пайремышт мланде паша йӱлалан да ушанлан пӱлеклалтын. Акрет годым тудым кок арня палемденыт. Юмо деч сай лектышым да суртвольыклан тазалыкым йодыныт. Тиде кечылаште унала коштыныт. Туге гынат пайремлан ик тӱн суртым ойыреныт. Суртозаштлан тиде пеш кугу чап лийын. Эн ончыч пӱртыш кӱтӱчӱ ден шонгыен-влак пырчым кышкен пуреныт. Самырык-шамыч кокыте пайлалтыныт: куштышо да ончышо лийыныт. Куштышо ӱдыр-влакым сурт паша деч коранденыт. Пайрем годым эн моторын да чаплын чияш тыршеныт. Икте-весе деке тувырым вашталташ коштыныт.

Е.СЕРГЕЕВА ямдылен.

Лектышан идалык



2024 ий мо дене шарнымашеш кодын? Тудо мероприятий, конкурс, конференций-влаклан поян лийын. Мый почеламутым марлат, рушлат сылнын лудаш йӱратем. Южгунам англичанлат каласкалем. Садлан тыгай сынан конкурслаште сенгымашем ятыр.

Звенигово, Йошкар-Ола, Волжск, Моско олаште эртаралтше тӱрлӱ конкурсышто сенгыше лийынам. «Российская школьная весна» конкурс поснак шарналт кодын. Тушто Н.Жирикын «Погиб при исполнении» балладе гыч ужашым каласкаленам да ойыргемалтынам. Пӱлек шотеш мемнам Моско олаште ВДНХ-ште эртаралтше «Россия» ончер-форумыш намиен коштыктеныт.

2024 ий Еш идалык лийын. Еш дене тӱрлӱ конкурсышто, акци-йыште вийнам тергенна. Шукерте огыл Волжск олаште «Нефиолетово» кугу фестиваль эртаралтын. Тушто ме марий калык кочкышым, ӱячам, ыштымаште мастер-классым ончыктенна. Икманаш, эртыше ий шуко поро шарнымашым, у йолташым пӱлеклен.

София ТИМОФЕЕВА.
Волжск олесе

9-ше номеран школ.

Фотом еш архив гыч налме.

Лум ончер

Ял калыклан У ий пайрем шӱльышым пӱлеклаш маньын, Янгетсолаште «Кудывечыште луман Кишке» ончерым келыштаренна (снимкыште). Кугыенжат, йоча-шамычшат йомак кугыжанышым сӱрастараш полшеныт. Поснак кугу тау мутым М.А.Захаровлан, З.В.Морозовалан, А.М.Захаровалан каласыман. Юзо шӱльышан верышке калык погына, фотографийым ышта. Лум кугыжаныш ял калык ден уна-влакым шошо марте куандараш тӱналеш.

Э.В.ЗАХАРОВА.

Параньга район.

Авторын фотожо.



У ий йомак

Ме кажне ийын тиде сылне пайремым поснак тургыжланен вучена. Вет У ий – тиде йомак. Ӱшнӱр школыштат юзо шӱльышан пайремым эртаренна. Мемнан деке Йӱштӱ Кугыза, Лумӱдыр, Патыр, Вуверкува ден Кашей унала толыныт (снимкыште). Шкежат тӱрлӱ костюмым ямдыленна. Ме пырля муренна, куштенна, модынна. Йӱштӱ Кугыза ден Лумӱдыр кажне икшывылан шере пӱлекым кучыктеныт.

Алина АЛЕКСАНДРОВА.

Советский район.

Фотом школ архив гыч налме.



2025 ийлан йоча гороскоп

Шорык (21.03-20.04)

Моткоч тале, виян улыда. Түрлым шонкалаш йоратеда. Шукыж годым түналме пашам кудалтен, весе деке пижыда. Тиде койыш деч корангаш тыршыман. Шүдыр-влак тазалыкым аралаш темлат.



Презе (21.04-20.05)

У түналтышлан жап. Шоналтыза, могай сомыл утларак келша да тудо аланыште виянаш түрлө йоным кычалза. Ача-авада тыланда оксам пуат гын, оккүл настан ида пытаре. Аныклараш тунемза.



Йыгыр (21.05-21.06)

Вес ег дене кылым вашке муын моштеда. Йолташ-влак коклаште лияш йоратеда. Яра жапда йоршын уке. Эре ум да онгайым кычалыда. Южгунамже кумылдам (эмоцийдам) шылташ тыршыза.



Рак (22.06-22.07)

Лыжга, шыма улыда. Шүдыр-шамыч тунеммаште кугу күкшытыш шуыда манын сөрат. Түрлө олимпиадыш, тагасымашыш ушнаш ида өр. Еш дене пырля иктаж сылне верыш миен коштса.



Лев (23.07-23.08)

Те эре ончылно лияш тыршеда. Лидер койышда кугу сенымашке шуаш полша. Корныштыда иктаж нелылык лектеш гын, ида ойгыро. Тудым те вашке сенген кертыда. Шке вийлан ушаныза.



Ўдыр (24.08-23.09)

Мудреч улыда, ончыкылык нерген шонкаледа. Шуко йодыш тендам тургыжландара: могай аланыште виянаш, могай професийым ойырен налаш... Ши жмашланда ушаныза, тудо чын вашмутым ойыраш полша.



Виса (24.09-23.10)

Түшкаште лияш йоратеда, йолташда шуко. Тений түрлө конкурсышто сеныше радамаште лияш йон уло. Иктаж учашымаш лектеш гын, коранга кайыза.



Скорпион (22.10-22.11)

Пенгыде койышда ятыр сенымашлан корным почеш. Йоратыме пашалан жапым ойырыза. Ег коклаште шукурак лияш тыршыза.



Пикшызе (23.11-21.12)

Лүддымө улыда. Эре ум кычалыда. Тыланда шуко корно почылтеш, күлешыжым чын ойырыза. Мутдам кучаш тыршыза.



Ирказа (22.12-20.01)

Уш-акылда пүсө. Жапдам да вийдам чын кучылташ тунемза. Каналташат ида мондо. Лишыл енда дене яндар южышто шукурак жапым эртарыза.



Вүд йоктарыше (21.01-20.02)

Тунеммаште моткоч тале улыда. Шотыш налза: чыла шке быштен моштеда гынат, түшкаште паша куштылгырак кая. Спорт дене кылым кучыза.



Кол (21.02-20.03)

Порылык дене ойырте-малтыда. Сурт янлыкым моткоч йоратеда. Ныл йолан йолташда уло гын, пеш пайдале. Чон ласкалык шотышто түткырак лийза.





Иленыт улмаш кочай ден ковай. Нунын кок уныкашт лийын: изиракше, Мишук, пашам пеш йӱратен, весыже, Васлийже, эре шолыжын ыштымыжым вучен.

Икана кочашт ойла:

– Мемнан коҥгаиш олташ пу пытен, кожлашке миен толза, мом-гынат поген кондыза.

– Йӱра, кочай, каена, – манеш изиракше.

– Тый кай, – пелешта Васлий изаже, – поген тол, мый тыште польшкалем.

Мишук кожлаш кая, тыгыде воштырлам погкала. Ик нумалтышым ямдыла да мӱнгыжӱ каяш тарвана. Ваштарешыже шонго коча лектеш.

– Тый мом тыгайым погенат? – йодеш коча.

– Пум. Мемнан коҥгаиш олташ пуна пытен. Кочай колтыш, «Поген тол» мане. Теве ик нумалтышым нангаем.

– Э-э, тиде могай пу?

– А тыгайжымат погыманыс, уке гын ты кожлаште ошкылашат ок лий, поҥгыланат, молыланат пурен от керт.

– Хм... Чын шонет, чын. А изат молан толын огыл?

– А тудо... А тый, кочай, изамжым кушеч палет?

– Ты кундемыште мо да кӱ улмым, мый чыла палем. Мый вет Кожла Оза улам. Тый мый дечем от лӱд мо?

– Уке, кочай, тый пеш порын коят, молан лӱдаиш?

– Тау поро шомакетлан. Ты-



ланет ме, чодыраште илыше-влак, мемнан пӱртнам эрыктыметлан кугу таум каласена, а мыйын по-



Кок уныка

лышкалышем-шамыч тыланет пӱэтым намиен пуат, корным веле ончыкто.

– Ой, поро кочай, Кожла Оза, тау тыланет! Мый кочамлан миен каласем.

– Уке, ит ойло нимомат.

Кожла гыч Маска, Шордо да моло янлык икмыняр моклака пум нумал кондат, Мишук почеш ялышке нангаят.

Коча лектын ончалеш: пӱрт воктене пу артана ямде!

– Тый кондат мо? – уныкаж деч ӱрын йодеш.

– Мый, мый, – шыргыжеш Мишук.

Жап эртымек, коча адакат уныкаже-влакым чодырашке пулан миен толаш кӱшта.

Кугурак уныкаже манеш:

– Теве Мишук тек кая, тудо мотор пум муын мошта.

– А тудо таче мыланем суртышто полшаиш кодеш, тый миен тол, – пелешта коча.

Вачыжым туртыктен-туртыктенак, Васлий кожлашке кая, тыгыде воштырым пога да мӱнгыжӱ каяш тарвана. Ваштарешыже шонго коча лектеш:

– Тый мом тыгайым погенат?

– От уж мо, пум! – сырен пелешта рвезе.

– Э-э, тиде могай пу?

– Тый палет гын, поген пу! – келесырын ойла Васлий.

– А молан тый тыгай торжа улат?

– А тый кӱ тугай улат, чыла

йодыштан, пален налнет? Шке пашат уке мо?

– Мый? Мый Кожла Оза улам. Тый ала-мо пеш лӱддымӱ гай коят.

– Кӱ деч лӱдаиш? Тый дечет? Ха!

Кожла Оза вуйжым веле рӱзалта – тыманмеш янлык-влак кудал толыт да рвезым йыр авырен шогалыт.

– Тетла тыйым ме кожлашкына огына пурто, – манеш Кожла Оза. – Поро кумылан Мишук шолыжым веле пуртена. Умылышыч? Тунем тудын деч. Ала вара тыланетат корным почына.

А кызыт йолташем-влак Мишуклан мемнан пӱлекнам нангаят.

Оза кидкопажым пералта – кожла гыч Маска, Шордо, Пире, Рывыж, Ур лектын шогалыт. Рывыж тӱрлӱ понгым поген, Ур шкеж кугыт мешакыш пӱкшым оптен, Маска мӱй печкем ондалын, Шордо, Пире тӱрлӱ емыж-саскам ямдыленыт.

– Тый ит мондо ойлымемым: ит йогылане, пашам йӱрате, поро кумылан лий, вара тый мемнан йолташ радамыш ушнет, – Кожла Оза рвезылан туныктен ойла.

Драгояр ЯНАЙ.
Медведево, Арбан.
Э.Ямбаршеван сӱретше-влак.



Кушто эн кужу кож?

Чодыра гыч кондымо кож-влакым танастарен ончалаш гын, Европышто Российын тун У ий пушенгыже – кокымшо верыште. Тудын кужытшо – 30 метр, кужгытшо – 60 сантиметр, 90 ияш. Вена олаште ныл метрлан кужурак кожым сорастареныт. Тыгак Римысе (29 метр), Варшавысе (27 метр), Лондонысо (25 метр) кож-влак ойыртемалтыныт.

Искусственный кож-шамычым танастараш гын, 53 метраным Бразилийысе Сан-Паулу олаште веранденыт. Испанийысе Мадридыште 37 метран, Индонезийысе Джакартыште 33 метран, Румынийысе Бухарестыште да Португалийысе Лиссабоньшто 30 метран пушенгылам шогалтеныт. Сидней, Париж да Йошкар-Олаште 25 метран кож йыр калык погына.

О.МОШКИНА-МАЙКОВА ямдылен.




Эрден эр акам пелен
Курыкышто мунчалтем.
Йушто ырыкта гына,
Лум пелен чонна кана.

И.Попов.

**Снимкыште: Йошкар-Ола гыч
Даша Попова ден
Анастасия Лебедева.
Фотом еш архив гыч налме.**

Кроссворд Родо-тукым Йушто Кугыза-влак



1. Шочмо акаже – Масторава.
2. Пүчө да имне олмеш снегоход полшымо дене коштеш.
3. Пөлекым ече дене намия.
4. Ожно тудым каза ужган да изи тукан марий семын сүретленыт.
5. Алангасар онар-влак кокла гыч пытаргыш улеш.

6. Ик эн самырык Йушто Кугызалан шотлалтеш.
7. Шочмо кечыжым 22 декабрьште палемда.
8. Мутым колыштдымо йоча-влаклан кучымо парентгым пөлекла.

Е.СЕРГЕЕВА ямдылен.

Палаш онай У ийыште тун тус

Удмуртийыште 2025 ийын тусшым ойыренгыт. Тудын лумжө – «Ижевский рябиновый». Каласен кодыман: пызле – Удмурт Республикын ик символжо. Тудын сүретшым Ижевск олан гербыштыже ужаш лишеш да пызле нерген Удмуртийын чапмурыштыжо муралтеш.

Тунялбалне палыме Pantone тус институт у ийын тун тусшылан «Мусс моккам» ойырен. Тиде шокшо күрен тус. Тудо айдемын көргө ласкалык деке шуаш тыршымыжым да пүртүс дене кылым пенгыдемдымыжым ончыкта.

Весела каныш

Лум мландым кужгын леведын. Ынде ече, издер, ватрушко дене мунчалташ лишеш. Теле каныш годым ялысе курыкна йоча йук дене йонгалтын. Мыланна ече дене мунчалташ утларак келшен. Курык вуй гыч торашке пикшла чыменна. Лум мочорымат ненчаш жапым муынна. Каныш кечылам пайдалын да веселан эртаренна.

Надя СТЕПАНОВА.
Морко, Коркато.

Сүретым чиялтыза.



0+

Марий Эл Республикысе «Марий Эл» увер агентстве» КАУ.
Директор – Е.И.КУЗНЕЦОВ.
Тун редактор – А.Н.ГРИГОРЬЕВА.

Индекс П4696.
Тираж 1550 экз.
Заказ
Формат – А-4-8.

Учредитель-влак:
Марий Эл Республикысе Тувыра, печат да калык-влакын пашашт шотышто министерстве,
Марий Эл Республикысе «Марий Эл» увер агентстве» КАУ.

Редакций да издатель: Марий Эл Республикысе «Марий Эл» увер агентстве» КАУ,
424006, Йошкар-Ола,
СССР Вооруженный Вийын 70-ше идалькыше урем, 20-шо порт.
Тел. 8(8362) 45-22-82.

Газетым редакцийыште погымо да верстатлыме, «Марий Эл Республикысе Правительствын типографийже» ООО-што ямде оригинал-макет гыч савыктыме.
Типографийын адресше:
424000, Йошкар-Ола,
Комсомольский урем, 112.

Печатьыш пумы жап – 14-00, фактически – 13-00.

Авторын да редакцийын шонымашышт түрлө лийын кертты. Серыш-влак мөнгеш огыт колталт. Ак – кутырен келшыме почеш.

https://vk.com/yamde_lii
<https://t.me/yamdelii>
yamde_lii@mail.ru
yamdelii@mediamari.ru (автор-влаклан)
Сайтын адресше: ямделий.рф

Газетым Кыл, информационный технологий да массовый коммуникаций сферым эскерыме шотышто федеральный службын Юл кундем федеральный округысо управленийыштыже регистрироватлыме.
Номер – ПИ № ТУ52-01404,
2023 ий 22 сентябрьште пумы.

- Тыйым пире авырен, угуч тунал.
 - Эше ик гана кошт.
 - Черетым весылан пу.
 - Корным кучыкемде.

Старт

Финиш

Эчкулан Йүштө Кугыза
деке миен шуаш полшо.